

'Sëédhε =plε -naa

'ö Pɔlö -ya bɔ

Timote

-dhë bhë 'ö =nε

1 ¹⁻²Timote, bhi 'ö ü -dhɔ -yö n -kë =nε -kɔ 'ö n -de gbö -dhɔ -yö n =kaa' -a 'dhö, ma Pɔlö 'a 'sëédhε =nε 'a- bɔ ü -dhë. Yesu Klito -bha bɔme -mü n 'ka, bhii -Zlan -dhi -a -dhë -wun -mü kö 'a kë -a 'ka. -Zlan -ya -pö n -dhë, pë 'ö- 'piö kö -yaan -a kë 'a- =blεε'- mε -nu -dhë. Pë 'ö bhë 'ö tɔɔ -toëpö -këdhösü -yö -dho kë -an -bha 'ka, -klu Yesu Klito -bha -sü 'gü. A -dhe kwa Dë -Zlan waa- kwa Dëmε Yesu Klito -an -gɔ kö -wo ü 'yena yö, -wo 'glusë kë ü 'ka. -Wo ü gbaa wo -bha -zuöyagluu 'ka.

**Pɔlö -bha -Zlan zuö pö -sü waa- -a -bha me -nu
-faan' -më -to -wo 'gü -sü -bha -sü**

³A -Zlan -bha yuö -kë, n =zuö' 'puu 'ka =nε -kɔ 'ö n 'bhema -nu -wa =kaa' bhë -a 'dhö. A ü -bha -bhεawodhe -kë -kplawo -Zlan -dhë 'töng 'saadhö 'ka, 'ö 'a- zuö pö ü -wun 'gü. ⁴A n -zo -ta 'töng 'ö 'kwa kaan kwa 'kuë- 'iin ü -bha 'gbo -nu 'ü- bɔ 'töng bhë -a 'ka bhë -a 'ka. A- 'piö kö 'ko -kpën ko 'kuë- 'zü. -Ya kë 'dhö n =zuö' 'glu -dho dhi 'sönggö -sönggö. ⁵-Zo -yö -Zlan -bha -sü 'yö -kë ü 'na Loisë waa- ü dhe Nisë -an -gɔ bhë, -a -bha -kë ü -gɔ -sü 'ö bhë, 'ma n -zo 'ta -a 'gü a -Zlan zuö -pö 'sönggö -sönggö. ⁶-A -wun 'gü 'a ü -zo -büö -kɔ -mɔ 'wun -bha -sü 'ö -Zlan -ya nu ü -dhë kö 'ma n -kɔ kpa ü -ta -bhεa' -sü 'ka bhë kö 'üën- -a 'kun 'gbee-! ('Ö tɔɔ -Zlan -yö yuö 'bhaa waa- -a kë -sü -faan -nu ü -dhë kö 'üën- -a kë.) ⁷Yuö -nu 'ö -Zlan -yö -an nu ü -dhë bhë kö =kun 'ö 'suö -yö ü -kë -an kë -dhia, bhii -Zuu 'slööslö 'ö- nu kwa -dhë bhë -yö kwa -zo -gban 'yö- -kë kö =kun 'ö 'kwa dho suö pë gbe -dhë, 'kεε -ya -kë kö 'kwaan- kë me -faanzë, 'ö -Zlan waa- mε -nu -dhɔ -yö -an -kë waa- mε 'wo wo -de =kɔɔn -an 'ka.

8-A -wun 'gü kö -kun 'ö lë- -yö ü -kë, 'wun 'ö -gban kwa Dëme -bha -a -blëe me -nu -dhë -sü 'ka! Ma 'a -kanso 'gü 'wun 'ö -gban Yesu -bha -a -blëe' -sü -wun 'gü bhë, kö -kun 'ö lë- -yö ü -kë n -dhë 'pö! 'Këe -bhö -nëng n -ma, 'ü 'we -a -bha kö ko 'klo -yaan bhö, ko -bha 'wuntaasë -blëe' -sü bhë -a -wun 'gü! 'Ö tɔɔ -faan' 'ö go -Zlan 'piö bhë -yö -dho -a kë kö 'klobhɔdhe 'ö bhë 'üen- -a bun. 9-Zlan -yö kwa -dha 'ö- pö kwa -dhë 'kwa kë 'slööslo kö 'kwaan- kë -a -bha 'ka. Yaa kë -ne kë 'kwa- wo 'wun -së kë me -nu -dhë -më 'ka. -Ya -kë 'dhö, bhii -ya 'piö kö 'ö 'wunsë kë kwa -dhë. 'Wunsë 'ö 'dhö bhë -dhe 'ö- -ya ö -zuö' 'piö -yaan kë kwa -dhë bhë -a -dhe -ya -glɔɔ. -Dhe -kë 'dhö -ya -kë kwa -dhë -bɔa' Yesu Klito 'gü -sü 'ka. 10'Këe -dëe bhë -yaa -zɔn kwa -dhë -ne ö 'glu -yö -së kwa 'ka kwa Dhame Yesu Klito -bɔ kwa -dhë -sü 'ka. Yesu Klito -ya lë- 'kpɔ ga -ta 'ö tɔɔ -ya kë -ne 'kwa ga, pë yaa 'gbee- gbe 'ka 'dho kë kwa 'ka. 'Ö- pö kwa -dhë -ne -ya kë -ne 'kwa- -bha 'wuntaasë 'ö bhë 'kwa- ma 'ö 'kwa 'we -a -wun -bha, -Zlan -yö -dho bun -dëü 'ö 'yaa -siö' -a nu kwa -dhë kö -toëpö -këdhösü -yaan kë kwa -bha 'ka.

11-Zlan -yö 'wun -nu 'wo -ne -an 'kluën -bho n -ma kö 'aan- -blëe' -me -nu -dhë. -Yö n -sü kö 'aan- kë -a -bha bɔme 'ka, 'go mü 'zü kö 'aan- më -nu -daan' -'wun -nu 'wo bhë -an 'ka.

12Pë 'ö -kë 'ö n 'klo 'dho bhö -na -kanso 'gü -dëe bhë 'ö bhë. 'Këe 'kö -kë -ne n 'klo -yö -bhö 'dhee, lë- 'ka 'dho n kë, bhii 'ö tɔɔ a Yesu Klito -dɔ, 'a n -zo yö -a -bha, 'ö 'a- -tei' dɔa -ne pë 'a- 'kluën bho -a -bha, -yö -dho -a -waannu -së 'ka, 'ö dho 'ö yöë yi 'ö dho za dɔa me -nu -bha bhë -a -bha.

13Timote, -bhö 'dho Yesu -wun -dhe 'wun gia- -sü 'ka 'dhiö! 'Go mü 'zü -dho -yö kë ü 'gü -yö kë -dho -kaa' do 'ö kwa -klu Yesu -bha -a 'ka! -Ya kë -ne 'bha 'wuntaasë -blëe' -më -nu -dhë, -yö kë 'wun -taɔ gia- 'a- -blëe' -ü -dhë bhë -a 'ka. 14'Wuntaasë 'ö -Zlan -ya 'kluën bho ü -bha kö 'üen- -a -blëe' -më -nu -dhë bhë -a 'kun 'gbee-! -Zuu 'slööslo 'ö kwa 'gü bhë -yö -dho ü gbaa -faan' 'ka kö 'üen- ü -zo kë -a 'piö.

15Ü- -tei' dɔ -ne Yesu -wun -dhe 'wun gia- -me -nu 'töüdhö 'wo Azi -se 'gü -wa wo bo n -wun 'ka. Fizedhö waa- Mozenë -nu -wo më -nu 'wo bhë -an 'piö. 16-18 (Nezifɔdhö -de 'pö -yö ö bo n -wun 'ka). 'Këe Nezifɔdhö -bha 'ö bhë, a- -dhe -na kwa Dëme -gɔ kö yö 'dhö waa- ö -bha 'kɔɔmë -nu 'dhö -yö -an 'yena yö. 'Ö tɔɔ lë- 'yaa- kë ma 'a -kë -kansogüme 'ka bhë n -dhë. -Dhe 'ö nu Wlɔmë plöö zö, -yö n -mëe ö -faan' 'ka 'tengdhö kö -yaan -tun n yö -na. -Yö -nu 'ö -büö -da n -dhë, 'yö n -faan' -më 'töng 'bhaa -nu 'ka -kanso 'kɔɔdhö zö. 'Go mü 'zü -kɔ 'ö nu n -dhë -a 'ka kö a Efezö plöö bhë 'ü- -dɔ. -A -kë 'dhö -sü -wun 'gü a- -dhe kwa Dëme -gɔ kö -ya 'yena yö, -a -bha zakanyi 'ka.

2 1 (Medhevadhe -wa 'kan n -ma; 'këe) Timote, bhi 'ü -kë -ne n gbö 'dhö ü -bha -zo -yö Yesu Klito -bha -sü 'gü bhë, -bhö 'to -klu -sü 'ka -a -bha kö 'glusë 'ö- -kë kwa 'ka bhë -yaan ü gbaa -faan' 'ka! 2-Wo -nu 'ü- ma n dhiö me -plëëzë wö 'dhiö bhë, -bhö -a -blëe' -më -nu 'wo -mɔ -a -bha kö

-waan -a kuënnu -së 'ka bhë -an -dhë kö wo -de 'pö -waan me -nu 'wo to -an -daan'-.

³-Bhö 'we -a -bha 'pö kö ü 'klo -yaan bhö -ne Yesu Klito -bha 'dhasi këwunsëzë 'ö -faan' 'dhoë- -gö 'ö -wa -bhö -na -a 'dhö! ('Ö tɔɔ me -nu 'ö 'wo me -daan 'wuntaɔsë bhë -a 'ka -së 'ka bhë, -an 'klo -yö -dho bhö. -Kɔ do bhë -a 'ka, -bhö 'we -a -bha kö kwaa- me -nu kwa 'klo -yaan bhö kwa -bha me -daan 'wuntaɔsë 'ka -sü -wun 'gü.) ⁴-Bhö kë -ne 'dhasi 'ö- 'piö kö ö -gɔme =zuö' 'glu -yö dhi ö 'piö -a 'dhö! Bhii -ya kë ö -gɔme 'piö, 'yaa ö -de -dhi -a -dhë -wun kë; 'këe 'wun 'ö- gɔme -zo 'kun -wun 'ka -ne 'ö- -kë. ⁵=Gɔɔnme yaa 'dho -mɔa -bha -yaan 'to -a 'gbee- 'ka kö yaa -gɔn tɔng 'kun. (-Kɔ do 'ö bhë 'ö bhi -de 'pö, 'ü dho Yesu Klito -bha yuö kaa -ne -kɔ 'ö- pöë bhë -a 'dhö kö 'üën- -a -truën yö!) ⁶'Go mü 'zü ü -bha yuö kë Yesu Klito -dhë -sü bhë, -a -tei' -kë -ne pëtame 'ö yuö -kë 'gbee- 'ö yö -blëzë 'ö- -dua' 'dhö -mü kö ö -bha tapë -nu 'wo bhë, -ya bhe dan bhë -a 'dhö. ⁷'Wun -nu 'a- -blëe bhë, -bhö ü -zo 'ta- 'gü kö 'üën- -dhe yö -a 'gü! 'Ö tɔɔ kwa Dëme -yö -dho -a -ta po ü -dhë kö -yaan kë ü -gö 'pëpë.

⁸Yesu Klito 'ö -kë -gludë Davidö =suu'- -ta 'në 'ka bhë, -bhö ü -zo 'ta -a këwun -nu 'gü! =Dhe 'ö ga -Zlan -ya -bho ga 'gü. 'Wuntaɔsë 'a- -blëe' -na me -nu -dhë 'ö bhë. ⁹Pë 'ö -kë 'a =wa -bhö -na -dëe 'ö bhë. -Wo n -da -dëüwo -kanso 'gü zö -ne me mezëme -da -kanso 'gü. 'Kö -kë -ne -wa -kë 'dhö 'dhee, ma 'wo n -zuö kɔɔ, waa -Zlan -wo -zuö kɔɔ; (-Zlan -wo -blëe'- -me -nu 'bhaa -nu 'wo to, -wo me -nu -daan' -na -a 'ka -kplawo). ¹⁰Pë -kë 'a -we -a -bha kö 'a bɔ 'wun 'gbee- =suu'- 'ö -ne -a 'gü 'ö bhë. -Yö kë 'dhö kö me -nu 'ö -Zlan -yö -an sü ö -bha 'ka bhë, -waan dha 'pö, -zo -yö Yesu Klito -bha -sü 'gü kö -wo kë -a 'piö, -a -bha 'tɔbhödhe -dhe -bha -toëpö 'ka.

¹¹(A -we -a -bha kö 'a =wa -bhö 'pö, bhii 'ö tɔɔ) 'wun -nu 'wo -ne 'wun gia- -mü. =Ya kë -ne 'kwa kwa -kwaa'- kwa -bha -tosiadhe yaa -nu 'ö 'kwa -kë -an 'gü 'dhiö bhë -an -zü, -a -tei' -yö -kë -ne -kɔ 'ö kwaa- Yesu -nu 'kwa ga -a -bha, kwa 'ko yöë -a 'dhö. =Dhe 'ö -kë 'dhö bhë kwaa- Yesu -nu kwa -dho kwaa- -tosiadhe kë kwa 'ko -bhaa. ¹²=Ya kë -ne 'kwa 'we -a -bha kö 'kwaan- =wa -bhö =zuösaadhe 'ka, kwaa- Yesu -nu kwa -dho -gludëdhe kë. 'Ö -ya kë -ne 'zü 'kwa- pö 'kwaa- dɔ, -yö -dho -a pö 'pö 'yaa kwa dɔ. ¹³=Ya kë -ne 'kwaa 'to kwa -wo 'gü, yö 'pö -yö -to ö -wo 'gü, 'ö pë 'ö- 'tɔ go me -nu -dhë, 'ö- -kë, bhii 'ö tɔɔ -yö -to ö -wo 'gü -kplawo, pë 'ö- pö -a kë -sü 'ka.

¹⁴'Wun -nu 'a- -blëe bhë, -bhö me =daan' -me -nu -zo -büö -an 'ka! -Bhöë pö -an -dhë -Zlan wö 'dhiö, ü -wo -yɔɔn -a -ta -sü 'ka kö -kun 'wo zaɔdhe -kë me -nu 'ka, 'wun 'ö- -gen 'yaa 'dhö -a 'gü! 'Ö tɔɔ me =daan' -me -nu -wo 'dhinaa kë -na, 'yaa pë -së kë me -nu 'wo to -an -gɔ, 'këe pë =siö' -'ö- wo -an -gɔ. ¹⁵-Bhö ü -faan' 'plë 'sü kö 'üën- kë me =daan' -me 'ö- -bha yuö -yö -Zlan -zo kun -a 'ka! -Bhö kë -ne yuökëme, 'ö lë- 'yaa- kë ö -bha yuö -nu kë -sü 'gü -a 'dhö! Ü -dho kë me =suu'- 'ö 'dhö bhë -a 'ka kö 'üën- me =daan'- kpengdhö, -Zlan -wo giagia 'ka. ¹⁶Me -nu 'wo -Zlan -wo yaa =blëe' -na 'iin

me -nu 'wo 'wun -nu 'ö -an -gɔ 'yaa 'dhö 'wo -an =bleɛ' -na bhë, kö -kun 'ü -kaan -an 'ka! 'Ö tɔɔ 'wun -nu 'wo bhë me -nu 'wo- =bleɛ' -na 'dhö bhë, -wo bhɔ -na -Zlan -dhë =taa' =gbiin -kplawo. 17'Go mü 'zü -an =bleɛ' -wun -yö pë yaa -kë, me 'bhaa -nu -gɔ 'pö =nɛ -kɔ 'ö bhüö 'dho 'kan -na -a 'ka me -nu -bha bhë -a 'dhö. Me =suu' -nu 'wo 'dhö bhë -an me 'bhaa -nu 'wo tɔɔ Imene waa- Filetö. 18 -Wo me -daan =sua -wun -nu 'ka, -a -pö -an -dhë -sü 'ka =nɛ kö -kun 'ö 'wo -ya -Zlan -bha me -bho ga 'gü -sü 'töng -gɔ gbɔ, bhii 'ö tɔɔ -Zlan =ya me bho ga 'gü 'saadhö. Me -nu =daan' -kɔ =suu' -'ö bhë, me -nu 'wo- ma, -yö -an -dɔ -gbɔudhö, 'ö pë 'wo dho wo -zo yö -a -bha 'waa -a dɔ. 19'Kɛɛ 'kö -kë =nɛ pë -nu 'wo bhë -wo -dhö 'dhee, -an -kɔ yaa 'dho -mɔ -a -bha kö 'wuntaɔsë giagia 'ö go -Zlan 'piö bhë, -wa bho ö pin -ta. -Zlan -wo -yö -kë =nɛ 'kɔ 'kpan 'dhö. -Kɔ do 'ö bhë -a 'ka 'pö, me -daan =sua -wun 'ka -sü 'ö bhë, yaa 'dho -mɔ -a -bha kö -yö -Zlan -wo bho 'gbloo. Bhii 'ö tɔɔ -Zlan -wo -gban -a -ta -pë bhë, pë 'ö -gban -sü 'ka -a -bha 'ö -ya -sü 'ka -Zlan -bha 'sëedhe 'gü 'ö tɔɔ: *Me -nu 'wo -Zlan -bha 'ka, -yö -an -dɔ. 'Go mü 'zü: Me 'ö- pö ö -Zlan -bha 'ka, -yö -dho ö -kwa'a' -pë yaa -nu kë -sü -zü.*

20=Naɔmɛ -gɔ kɔɔ, 'tia- -nu 'wo -kë 'sënnɔ 'ka -wo mü, 'ö 'tia- -nu 'wo -kë zënnɔ 'ka 'wo mü. -A 'bhaa -nu -wo mü 'wo -kë 'lü 'ka, 'ö- 'bhaa -nu -wo -kë gbɔ 'sɛ kpö 'ka. 'Tia- me -nu 'wo -kë 'sënnɔ -nu, zënnɔ -nu 'ka, -wo -an -sü 'wlaan- -yí =vava -nu 'ka. 'Ö -an me -nu 'wo -kë 'lü -nu 'ka 'iin 'sɛ kpö -nu 'ka, 'wo -an sü 'wun -nu 'ö -an -wun 'yaa 'gbee- =duö -an -yuö -kë -a 'gü -pë 'ka.

21-Kɔ do bhë -a 'ka, me 'ö -kan pë yaa -nu -bha, -yö -dho kë me 'ö -Zlan dho -a sü -yaan -a kë pë -wun 'gbeezë -kë -a 'ka -pë 'ka -nɛ -kɔ 'ö 'wo 'tia- -së =waannüë -de -dhë, 'ö 'wo- sü kö -wo pë 'giangian -nu =suu' -'saadhö kë -a 'gü bhë -a 'dhö.

22-A -wun 'gü kö -kun 'ü pë yaa 'ö -dadhëü -plëëzë -nu 'dho -an kë -na bhë, 'ü -an kë! Bhi -zë, ü -de nu pë 'ö kpengdhö -a kë -sü -dhë! 'Go mü 'zü, -bhö 'dho ü 'dhiö Yesu Klito -wun -dhe 'wun gia- -sü 'ka! -Zlan waa- me -nu -dho -yö ü -kë! Me -nu 'ö 'wo -Zlan =bhlë -ya 'ö -an 'ta 'sü -kɔ 'dho kpengdhö -Zlan wö 'dhiö, ka -nu -ka -tosiadhe kë =zuöyagluu 'ka ka 'ko -bhaa!

23-Kun -kë 'ü zaadhe këwun -nu 'ö -an -gɔ 'yaa -dhö -an =bleɛ' -me -nu 'piö! Me -nu 'wo bhë, 'waa 'wun -bho 'kou gbe dɔ. Kö -kun 'ü- -kë 'dhö 'ö tɔɔ ü -tei' =dɔa' =nɛ me -nu 'wo- kë -na 'dhö bhë, 'dhinaa =nɛ 'ö -ya kë 'ö -an 'dhiö dho to -a -ta. 24'Kɛɛ kö Dëme -bha yuökëmɛ =dua' 'yaa -mü kö -yö 'dhinaa -nu kë. Pë 'ö dho -a kë 'ö tɔɔ -a 'glu -dho kë -së me 'bhee- =suu' -'kpekpe 'ka! -Yö -dho kë 'zü, me =daan' -me 'ö- -kɔ -mɔ -a -bha kö -yaan me =daan' -së 'ka =zuösaadhe 'ka -a 'ka! 25'Kö me -nu 'ö 'wo zaadhe -da -Zlan -bha me =daan' -wo 'ka bhë kö -yaan -an =dɔɔ' -wo 'pëëpë 'ka. -Yö mü 'zü -Zlan -yö -dho -a kë 'ö 'wo wo -ta yö wo -bha =sɔɔn yaa -bha 'ö me =daan' -wo 'ö bhë, 'wo- -dhe 'wun gia- 'ö 'wo wo -zo yö -a -bha 'zü. 26-Ya kë 'dhö

-an -ko -yö -dho -mɔa -bha kö -dhe -yö 'wun 'gü -sü -yaan kë -an -gɔ kö -waan 'go dü -bha 'piigbeedhe kwɛɛ. Dü 'ö bhë -ne 'ö -an kë ö -zo 'kun -wun -nu -kë -an 'ka -pë 'ka -be.

'Wun -nu 'wo dho kë yi 'dhiötöyi 'ka

3 ¹A- 'piö kö 'ü- 'wun dɔ -ne 'kpongtaadhe 'dhiötöyi -yö 'to -na 'tee, yi 'gbee- -yö -dho kë -dhö. ²Töng bhë -a 'ka, =zuöyaame -nu 'ö 'wo wo -de -dhë -së, 'ö 'wëüga -dho -yö -an -kë =duö, -wo -dho kë -dhö. -Wo -dho wo -de -wun -bleɛ'-; -wo -dho wo -de sü =va; -wo -dho 'wun yaa -bleɛ'- -Zlan waa- wo mɛ -nu -an -gɔ. 'Në -nu -gɔü' 'gbeezë -nu, -wo -dho kë -dhö. Mɛ -nu 'wo bhë wo 'ka 'dho 'wun 'slööslo gbe =bhlë -ya; yö do bhë 'zü me -zlö trö -sü -zë -nu -mü -an 'ka. ³Me -nu 'ö 'wo 'dhö bhë, -an -bha 'glu yaa =duö bhë -a -wun 'gü, me -nu 'yena yaa 'dhö kë -an 'gü. =Sua -wun -nu -ne 'wo 'dho -a dɔ mɛ -nu -bha; -wo -dho kë =naazë =duö, pë 'dhiö- -kë mɛ 'ka -mɛ -mü -an 'ka. ⁴Wo 'ka 'dhö to me -nu 'piö -dho kpinngdhö 'ka; -zo -yö -an -bha -mɛ -nu 'waa -mü -an 'ka; -naazuëwunkëme -mü -an 'ka. -Wo wo -de -sü =va =duö. -An -de 'yi -kan -an -dhë -wun =ne 'wo- 'piö kö 'wo- kë, 'kɛɛ -Zlan 'yi -kan -a -dhë -wun -dho 'yaa -an kë. ⁵Wo- -kë =ne me -nu 'wo -Zlan =bhlë -ya giagiawo -an 'dhö, 'kɛɛ -Zlan -bha 'piigbeedhe ('ö- 'piö kö 'ö- nu mɛ 'bhee- -nu -dhë -waan -tosiadhe -së kë -a 'ka) bhë, 'waa 'we -a -bha kö -wo wo -zo kë -a 'piö. -Bhö 'kan mɛ -nu =suu'- 'wo 'dhö bhë -an -bha! ⁶-An mɛ 'bhaa -wo =sua -kë 'slë 'ka, 'wo -da me -nu -gɔ kɔɔ, 'ö 'wo dhoo -nu 'ö 'waa pë gbe dɔ, 'ö 'wo =sua -wun -nu =bleɛ -an -dhë kö -yö kë 'dhö kö -wo -an -wun -dhe 'wun gia-. Dhoo -nu 'wo bhë, pë yaa =va kë -me -nu -mü -an 'ka; 'ö pë yaa =suu'- 'kpekpɛ -dho -yö -an -kë. ⁷-Wa 'piö kö 'wo kë 'wundɔmɛ 'ka -kplawo, 'kɛɛ -Zlan -bha mɛ =daan' -wo kpengdhö -gen dɔ -sü 'ka 'dho kë -an -gɔ 'gbeedhö. ⁸Bhii 'ö tɔɔ mɛ -lü =suu'- yaa -zë -nu 'wo bhë, -wo -dɔ -Zlan -bha mɛ =daan' -wo kpengdhö 'ö bhë -a -gɔ 'yënn mɛ -nu 'ka =ne -kɔ 'ö Zanesö waa- Zamblesö 'wo dɔ -a 'ka Moizö -gɔ 'yënn 'kpa bhë -a 'dhö. Mɛ =suu'- -nu 'wo 'dhö bhë 'wun yaa dosen =ne 'wo wo -zo -ta -a 'gü. -Zlan -ya 'kan -an -bha, 'wun 'ö go -a 'piö -a -dhe 'waa- wo 'wun gia- bhë -a -wun 'gü. ⁹Mɛ -nu =plëezë, waa 'dho ziö -an 'piö, 'ö tɔɔ -wo -dho -a =tei' dɔ 'fefedhö =ne, 'wunbhokoudɔdhe 'yaa -an -gɔ =ne, -kɔ do 'ö mɛ -nu -wa yöë Zanesö waa- Zamblesö -an -gɔ 'kpa bhë -a 'dhö.

Pölö -bha Timote -zo -gban -wo

¹⁰Bhi 'pö, -Zlan -bha mɛ =daan' -wo 'a mɛ -nu =daan -a 'ka bhë, ü- -dɔ 'fefedhö. -Kɔ 'a -tosiadhe =kaa' bhë 'ü- dɔ. Pë 'a- yö -na 'ko 'dhiö n =zuö' 'piö 'ü- dɔ. N -ma -zo -yö -Zlan -bha -sü, n -ma =zuösaadhe, n -ma mɛ -nu waa- -Zlan -dho kë -kɔ 'ü -an 'plɛ dɔ. 'Go mü 'zü 'ü- =tei' dɔ =ne n 'ka n =kwaal- kwa Dëme -bha 'wun -nu -zü ¹¹kö a =wa -nu -bhö -sü 'gü. Mɛ -nu -wo n 'klo -bho Ticsö, Ikönë waa- Litрэ plöö: A =wa -bhö mɛ -nu 'wo mü

-an kwεε, 'kεε a n -kwaa n -de -wun -zü, =wa bhë -a -bhö -sü 'gü. =Dhe -kë 'dhö, kwa Dëme -yö n -bho 'klobhdhe =suu'- nu 'wo bhë -an 'gü 'töüdhö. 12-Kwaa =tei' dɔa =nε mε 'töüdhö 'wo- 'piö kö -wo -klu Yesu Klito -bha -Zlan -dhi -a -dhë -wun kë -sü 'ka, -an 'klo -dho bhɔ. 13-Zuöyaame -nu 'ö 'wo mε -nu -dian -na bhë -an -bha =zuöyaadhe waa- -an -bha mε -dian -sü 'wo bhë 'dho 'ö dho -a wo 'dhiö -kplawo. -Wo -dho mε -nu -püö, 'ö dü -de 'pö 'ö -an -püö. 14'Kεε ü -bha 'ka, pë 'ü- =daan, 'ö 'ü- =tei' dɔa =nε 'wun gia- mü bhë, -bhö 'dho ü 'dhiö, -a -dhe 'wun gia- -sü 'ka -kplawo! Bhi gia-, ü mε -nu 'wo ü =daan -Zlan -wo 'ka bhë, 'ü -an -dɔ. ('Go mü 'zü 'ü- =tei' dɔa =nε mε =daan' -wo giagia =nε 'wo ü =daan -a 'ka.) 15'Go ü 'nëdhe 'gü 'ö yö =dεε -bha, -wo 'slööslö 'ö -ya -sü 'ka -Zlan -bha 'sëédhe 'gü, ü- -dɔ. -Zlan -wo bhë -yö -mɔ -a -bha kö -yö 'wun -bho 'kɔu dɔ dhe nu ü -dhë kö 'üën-dha Yesu Klito -wun -dhe 'wun gia- -sü 'ka. 16Pë 'saadhö 'ö -ya -sü 'ka -Zlan -bha 'sëédhe 'gü, -Zlan -yö -bɔ -Zuu 'slööslö 'gü 'ö- -ya mε -nu =zuö' 'piö, 'ö 'wo- -ya 'sëédhe 'gü. -Zlan -wo 'ö bhë -yö kwa -daan 'wun gia- 'ka. 'Go mü 'zü -ya -kë 'ö pë -nu 'ö 'waa kpengdhö 'kwa -an dɔ. -Zlan -wo 'ö bhë 'zü, -yö kwa -dɔɔ 'ö kwa =daan pë -së kë -sü 'ka. 17-Kɔ 'ö bhë -a 'ka, -Zlan -wo -ya -kë 'dhö kö mε 'ö -Zlan -bha 'ka, kö -a -kɔ -mɔ pë -së =suu'- 'saadhö kë -sü -bha.

4 1 Yesu Klito -yö -dho nu 'zü 'kpongtaa kö -yaan -gludëdhe kë. -A -kë 'dhö -sü 'gü -yö -dho mε -nu 'wo 'bhee- waa- mε -nu 'ö =wa ga -an -bha za kan. -A -wun 'gü, a- -pö ü -dhë -wo =yɔɔn -a -ta -sü 'ka, -Zlan waa- Yesu Klito -an wö 'dhiö: 2-Bhö mε -nu =daan'- -Zlan -wo 'ka! -Kë 'siözë -sü -yö kë ü -gɔ -kplawo kö 'üën- -Zlan -wo =blεε'- -an -dhë 'kö -kë =nε yaa dhi -an -dhë 'dhee. =Ya kë 'zü =nε mε -nu -wo pë yaa kë -na, -bhö -an =dɔɔ' -a -zɔn -an -dhë -sü 'ka =nε pë 'wo- kë -na bhë, -wo wo bo -a 'ka. -Bhö -an =faan' 'më! -Bhö -an =daan'- =zuösaadhe 'ka! 3'Ö tɔɔ yi -nu -wo nu -na, 'ö mε -nu waa 'dho we -a -bha kö -wo wo 'to 'to -Zlan -bha mε =daan' -wo giagia -bha. 'Kεε mε =daan' -mε -nu 'ö -an -wo dho -an -zo kun 'wo dho -an =mεε'- . 'Ö tɔɔ -wa 'piö kö -wo pë yaa =plëézë -nu kë. 4-A -gen 'ö tɔɔ wo 'ka 'dho kë -a 'piö kö 'wo wo 'to 'to, 'wun 'ö 'wun giagia 'ka -a -bha, 'kεε -kwezü -wun -nu 'wo dho to -a 'piö. 5'Kεε =ya kë ü -bha 'ka, a -dhio -dɔ ü -dhë kö 'wun -ma ö -gen 'ka -sü -yö kë ü -gɔ, -kɔ =suu'- 'saadhö 'plε -ta! -Bhö 'we -a -bha kö ü 'klo -yaan bhɔ! -Bhö 'wuntaɔsë 'ö -gban Yesu Klito -bha, -a =blεε'- mε -nu -dhë! Ü -bha yuö -nu 'wo -gban -Zlan -bha, -bhö -an 'plε kë -së 'ka! 6('Wun -nu 'wo bhë 'töüdhö a- =blεε ü -dhë, 'ö tɔɔ n 'ka 'dhö kë ü 'piö =glɔɔsü gbɔ 'kpongtaa zö kö 'aan- 'ye n 'zü 'aan- bɔ -a 'piö ü -dhë zlöö.) -A yi =ya -lo kö 'aan- 'go 'kpongtaa. N -ma yuö -kë -Zlan -dhë -sü 'ö bhë -a -wun 'gü, mε -nu -wo -dho n zë. N -ma ga -sü 'ö bhë, -a =tei' -yö -dho kë =nε sla- bho -sü 'dhö. 7Yesu Klito -bha yuö mε 'ö dɔ n =tian, a n 'gü dɔ 'gbee- 'a- -kë -së 'ka. Pë 'ö -Zlan -yö -kë -a 'piö kö 'aan- kë, a- -kë =nε -bla sü -mε 'ö zian ga 'ö dho -bla sü -a -ta, 'ö bɔ -a 'plε -bha -a 'dhö. A n -zo -yö

-Zlan -bha 'ö dho 'ö yöë -dæe 'ö -kë -a 'dhiötöyi 'ka bhë -a -bha. ⁸-A -wun 'gü kwa Dëme 'ö dho mæ -nu -bha za kan kpengdhö bhë, -yö -dho n -ma -kë kpengdhö -sü 'gɔ ɔgblaa' nu n -dhë, -a -bha mæ -nu -bha zakanyi 'ka ('ö tɔɔ pë 'ö kpengdhö 'a- -kë -nɛ -bla 'sü -mæ 'ö 'to -a 'gbee- 'ka bhë -a 'dhö). Yaa 'dho ma do n -saan' nu; mæ 'saadhö 'wo dɔ -a nu -sü -gɔ, -a -dho kë -sü 'ka, -yö -dho -an -bha nu 'pö.

'Wun 'ö -gban Pɔlö -de -bha

⁹⁻¹¹Me -nu 'ö 'wo nu n -dhë 'dhiö bhë, Lukö do 'kpaan -nɛ 'ö n 'piö zö zlöö. Demasö -ya 'kan n -ma, -ya 'dho Tesalɔnikö plöö; 'ö tɔɔ -yö 'kpongtaapë -nu -dho -kë -duö ('ö -ziö -a 'ka pë -nu 'wo -Zlan -bha 'ka -an -ta). Klesaan -ya 'dho Galatö -se 'gü; Titö -ya 'dho Damasi -se 'gü 'pö. -A -kë 'dhö -sü 'gü, -bhöë kédhe -mæe' -kö 'üen- nu n 'piö zö 'zodhö. -Ya kë -nɛ ü nu -na, kaa- Maakö -ka nu! 'Ö tɔɔ n -ma -wun -yö -dho yö -a -bha nu n -dhë -sü 'ka kwa Dëme -bha yuö 'gü. ¹²'Ö tɔɔ 'ma Tisikö bɔ Efezö plöö. ¹³Ü nu -na, -bhö nu n -ma gblang 'a- to Troasö plöö Kaapusö -gɔ kɔɔ bhë -a 'ka n -dhia! -Bhö nu 'zü n -ma 'sëédhe -be -nu bhë -an 'ka. 'Kɛɛ -a mæ 'ö -kë wü kwi 'ka, 'a pë -nu -bɛen' -na -a -ta bhë, 'ö n -ma -wun -yö yö -a -bha kpinngdhö.

¹⁴Alezandrë 'ö -kë -piöbhome 'ka bhë, -yö 'wun yaa -gbaɔnsü -kë n 'ka. Kwa Dëme -yö -dho za -lo -a tuö, pë yaa -nu 'ö -an -kë n 'ka bhë -a -wun 'gü. ¹⁵Bhi -de 'pö, -bhö -a kë 'slë 'ka kö -kun 'ö dho pë yaa kë ü 'ka 'pö! 'Ö tɔɔ -Zlan -wo 'ö 'kwa- -blæe' -na mæ -nu -dhë bhë, -dɔ -a -gɔ 'yënnɔ -mæ -mü -a 'ka.

¹⁶'Dho -blæzë 'a- wo zakanmæ -nu 'dhiö bhë, mæ gbe yaa kë n 'piö mü. -Wo n -to n -de 'sloo 'ka. 'Kɛɛ a- -dhe -na -Zlan -gɔ kö -kun 'ö dho -an 'klo bhɔ. ¹⁷('Kö -kë -nɛ mæ 'bhee- -nu -wo n -to do 'ka,) kwa Dëme -yö -kë n 'piö; -yö -faan' -nu n -dhë, 'ö 'a- -wo -blæe mæ -nu 'waa Zuifö 'ka 'ö 'wo -kë mü -an wö 'dhiö 'fɛfedhö. 'Wun 'gbee- 'ö bhë -Zlan -yö n -dha -a -gɔ -nɛ -kɔ 'ö mæ dha -na -a 'ka -laa' 'dhi -gɔ bhë -a 'dhö. ¹⁸'Go mü 'zü a- -tɛi' dɔ -nɛ, -yö -dho n dha 'wun 'gbee- -suu' -'kpekpɛ 'wo dho nu n -ta -an -gɔ. -Yö -dho dho n 'ka 'zü, -kɔ -sëézë -ta, dhang- 'gü -dhe 'ö ö -bha -gludédhe kë -na -a -bha bhë -a -bha. -Kwaa 'tɔ bhɔ, 'kwa dhoë 'dhiö -kplawo! Amen.

'Wun 'a- -kë 'aan- -blæe' -ü -dhë bhë 'ö bhë

¹⁹'Ma 'we Plisilö waa- Akilasö -an 'ka! 'Ma 'we Onezifɔɔ -gɔ 'kɔɔmɛ -nu 'ka! ²⁰Elatö -yö -to Kolentö plöö. A Trofimë -to Miletö plöö, 'ö tɔɔ yaa kë -potaasü 'ka. ²¹Ü 'gü -gban kö 'ü nu n 'piö zö 'nene 'töng 'dhiö! Bulusö, Pudan, Linisö, Klodia waa- kwa dhegluzë -nu mæ 'wo to 'wo -klu -sü 'ka Yesu Klito -bha, -wa 'we ü 'ka!

²²A- -dhe kwa Dëme -gɔ kö -yö 'to ü 'piö, kö -yö 'dhuë- 'kɔɔ ka 'plɛ ka -bha!